

TUSI TAIALA

FUAFUAGA TATAU MO LE PULEA MA LE VA'AIA LELEI O I'A MA FIGOTA O LE GATAIFALE



SAUNIA:

Pule mamalu a Alii ma Faipule ma tagatanu'u o le afio'aga o **Sasaai** faatasi ai ma le lagolagosua a le Vaega o Faigafaiva.

Matagaluega o Faatoaga ma Faigafaiva (MAF)

FAASOLOGA

1	UPU TOMUA.....	3
1.1	Autu o le Taiala	3
2	FAAMATALAGA O LE AFIOAGA	4
2.1	Gataifale o Sasaai	5
2.2	Faigafaiva ma Faafitauli	5
2.2	Aotelega o Tulafono Faale-nuu tau Faigafaiva i Aso ua Mavae.....	5
3	O LENEI FUAFUAGA TATAU/TAIALA	6
3.1	Tapenaga o le Taiala	6
4	FUAFUAGA FAATAATITIA MA TULAFONO.....	7
4.1	Tulafono Autu o Faigafaiva.....	7
4.2	Tulafono Faatonutonu o Faigafaiva (mo le Laiti o l'a ma Figota).....	7
4.3	Tulafono Laiti a Afioaga	8
5	FUAFUAGA FAATAATITIA MA TULAFONO A SASAAI.....	8
5.1	Faasaina o Faigafaiva le Talafeagai.....	8
5.2	Taofia le Faiva o le Fa'amo'a poo Tu'iga	8
5.3	la Faasaina Upega ma Tili Matanini'i.....	9
5.4	Faia le Nofoaga/Ogasami Faasao o le Gataifale	9
5.5	Taofia le fagotaina faapisinisi o Fugafuga ma isi ituaiga.....	10
5.6	Taofia le Faatafunaina o Gataifale o Sasina	10
5.7	Faasaina le taaloa o Meaituaolō i le gataifale.....	11
5.8	Aoina ma Faatamaia Alamea.....	11
6	TALOSAGA A LE AFIOAGA.....	11
7	UPU MULIMULI.....	12
8	SUI AUAI I FONOTAGA MA FAATALATALANOAGA	12

Fa'alupega o Sasaai

**Afio le Taulagi Toleafoa ma Vaafusuaga
Alalatai le matua fetalai o Segi
ma le Pule Falelua ma Salemuliaga**

1 UPU TOMUA

E faamoemoe tele le fofoga taumafa o afioaga i faigafaiva ma punaoa o le gataifale ae le gata i lea o atinae mo le tamaoaiga o aiga. I le tele o afioaga, latou te le o faatauaina le pulea tatau ma le vaaia lelei o punaoa ma le siosiomaga o le gataifale. O le faaaogaina o auala faa-onapo-nei mo fagotaga e iai mea manava, upega faapea tili mataninii ina ia tele ai i'a maua ua tele ai na faaitiitia ma faaleagaina nofoaga o i'a, figota ma meaola o le sami. Ua avea foi le tanumia o vaega o le sami mo eleele-fou (fanua) faapea le faatinoga o faigafaiva le talafeagai pei o fanaia, ava niukini, vailau oona ma faamo'a /tu'iga ua tele ai aafiaga i le gataifale. O nei faafitauli ua matua faaitiitia ai i'a ma figota ae le gata i lea o aafiaga i mala faalenatura e pei o galu malolosi faapea matagi ma afa pei o Ofa (1990), Valelia (1991), Heta (2004) ma le galu lolo/tsunami (2009).

O nei faafitauli pei ona ta'ua faapea le soona fagotaina o aloalo ua faapea ona faatamaia ma faaitiitia ai punaoa o le sami. O lo o vaaia pea le taugata ma le siisii i luga o tau o i'a faapea figota ma ua avea ma auala ua faamoemoe tele ai tagata Samoa i meaai tuu aisa ma meaai tuuapa o lo o faatauina mai atunu i fafo. O se atugaluga lea o loo iai i le taimi nei ae le gata i lea o le faamoemoe tele i le tupe aua mea taumafa i aso uma.

O le Polokalame Faasao mo le Pulea Tatau ma le Vaaia Lelei o Gataifale o Samoa na amata mai e le Vaega o Faigafaiva i le tausaga 1995 i se faatupega ma le fesoasoani mai o le Malo Ausetalia (AusAid) mo le lima tausaga. Ma ua faaaauauina nei e le Malo o Samoa lenei polokalame e ala i le Vaega o Faigafaiva. O lenei polokalame e matua faatauaina tele ai le galulue soosoo tauau ma afioaga aemaise le sao o alii ma faipule faapea afioaga i le pulea tatau ma le vaaia lelei o latou gataifale. O taualumaga o le polokalame e aofia ai le soalaupuleina ma le fausiaina o Fuafuaga Tatau poo Tusi Taiala e tamauina ai fuafuaga faataatitia a afioaga faapea matafaioi a le Vaega Faigafaiva e lagolago ai lenei polokalame.

Ona o le taua o lenei polokalame, ua a'e ai se tofa i le afioaga o Saasaai e galuelue ma le Vaega o Faigafaiva e fausia lenei Fuafuaga Tatau/Tusi Taiala aua ni fuafuaga faataatitia faapea ni tulafono laiti e lima taitaia ai le afioaga i le gafataulimaina o punaoa o le gataifale.

1.1 Autu o le Taiala

O le autu lenei sa faatalatalanoaina ma malilie autasi i ai vaega uma o le afioaga:

“Toe faaleleia tamaoaiga o le gataifale mo tupulaga lalovaoa o le afioaga”


O isi vaega sini taua sa faaalia ma talanoaina o le:

- Toe faatupulaia i'a ma Figota aua le fofoga taumafa aemaise tupulaga i le lumana'i e ala i le Pulea Tatau ma le Vaaia Lelei o Punaoa ma le siosiomaga o le gataifale.

2 FAAMATALAGA O LE AFIOAGA

O le afioaga o **SASAAI** e i le itu i sasa'e o le motu o Savai'i (vaai i le faafanua) i le itumalo o Faasaleleaga III. O le toatele o ona tagata e nonofo latalata i le sami pe a ma le 60% ae o nisi e nonofo i fanua i ga'uta. Ua siitia le faitau aofai o ona tagata i le 621 i le 2006, mai le 530 tagata i le tusigaigoa 2001, (Ofisa o Faamaumauga, 2006).

Ata 1: Faafanua o Savaii o lo o faailoa mai ai le afioaga o Sasaai



Vaega Faufautua (Ofisa Faigafaiva, 2010)

O mamalu pulega a alii ma faipule o Sasa'ai ma e fesoasoani tele le aumaga i galuega faatino pei galuega mamafa i totonu o le afio'aga faapea le faiva o le tautua. E le gata i lea o tamaitai faapea faletua ma tausi o lo o faagaioia isi galuega taua e lagolagosua i le atinaeina o le afioaga.

E na o le Ekalesia Faapotopotoga Kerisiano i Samoa (EFKS) le tapuaiga o lo o maua i totonu o le afioaga ma e iai foi ma le aoga tulaga lua (Primary School) o lo o aotauina ai alo ma fanau.



Malumalu EFKS



Aoga Tulaga lua – Sasa'ai (Primary School)

2.1 Gataifale o Sasaai

E laugatasi laufanua o Sasaai aemaise le itu i sasae e oneone ma laulelei ae o le ogatotonu agai sisifo e fai si gaoa. O le a'au pe a ma le 250-300 mita le mamao mai le matafaga lea ua iai le taligalu. E lua vaitaele e latalata i le sami o lo o faasimā ma vaia lelei e le komiti ae tele foi punavai i le gataifale pe a oo ina pe le tai.



Taligalu i le gataifale ma laufanua o Sasaai

Vaitaele o le afioaga

2.2 Faigafaiva ma Faafitauli

E faalagolago le toatele i faigafaiva e le gata i le fofoga taumafa, mea fai a aiga, ekalesia, faalavelave faapea le tamaoagia. O itupa malosi e fatinoa fagotaga maulu i le aloalo ma tua'au, ae o tamaitai e fagotaina figota ma isi taumafa sami e pei o limu, fugafuga, tuitui, matalelei ma isi.

O i'a e maua mai faiva i tuaau e pei o ātu, asi'asi, malauli, laea, ume ma isi i'a alalo ae o fagotaga masani i le aloalo e maua mai ai fuga, pone, alogo, manini, mataeleele, ili'ilila ma isi. E le gata i lea o figota ma meaai sami e pei o faisua, aliao, alili, pusi, fe'e, tuitui, limu ma isi figota.

Sa tele aafiaga na mafua ai ona faaletonu le tulaga o i'a ma figota e maua mai le gataifale pei o le faaaogaina o ava niukini, vailaau oona, fanai'a ma isi faigafaiva le talafeagai pei o tu'iga aemaise lava i le vaitaimi o le 1970 agai i le 1990. O isi faafitauli e pei o le tele o le alamea sa tele ina pe ai le amu ola faapea le limulimu e lilofia ai vaega o le fogatai. E le gata i lea ae o mala faanatura pei o le afa o Ofa i le 1990 ma Valelia i le 1991. O nei faiga faapea le soona fagotaina o i'a ma figota ua avea lea ma ala sa faaititia ai i'a ma figota faapea le faaleagaina o amu ma a'au.

2.2 Aotelega o Tulafono Faale-nuu tau Faigafaiva i Aso ua Mavae

Ona o nei faafitauli i gataifale o Sasaai e pei o isi afioaga sa amata ai loa ona usitaia tulafono a le malo sa faamalosia ai le faasaina o faigafaiva le talafeagai. O le ala foi lea ua amanaia tele ai e le afioaga lenei polokalame mo le Pulea tatau ma le Vaaia lelei o gataifale ina ia aoga mo alo ma fanau i le lumanai.

O tulafono ia faalenuu e puipua ai le gataifale ma punaoa o le sami e pei o le:-

- faasaina o fanai'a;
- faasaina o ava niukini ma vailaau oona;
- faasaina o faigafaiva pei o tu'iga ma faamo'a.

E le gafatia e le malosi faaletulafono a le malo ona malu puipua le siosiomaga o le gataifale ona o le toagaogao o le aufaigaluega ma le utiuti o le seleni e faamalosia ai tulafono i nuu taitasi o Samoa ae o le Taua

o lenei polokalame faasao e galulue faatasi ai afioaga aemaise alii ma faipule e fesoasoni i le Vaega o Faigafaiva i le pulea ma le faaaogaina tatau o punaoa o le gataifale.

3 O LENEI FUAFUAGA TATAU/TAIALA

O le faamoemoe mauluga o le malo, ia mau pea Samoa ma ia faaleleia le soifua manuia o tagata lautele aemaise le faatupulaia pea o mea taumafa e le gata i fua o faaeleeleaga ae faapea taumafa sami. E pei ona ta'ua i le amataga, o le **AUTU** na talanoaina ma autasi uma iai finagalo o vaega taitasi o le afioaga i taimi o faatalatalanoaga o le "Toe faaleleia lea o tamaoaiga ma punaoa o le gataifale au tupulaga i le lumanai."

O lenei Fuafuaga Tatau ua faamoemoe e faaaogaina ma tomatau ai galuega faatino a le komiti ma le afioaga faapea le lagolagosua a le Vaega o Faigafaiva, ma e mafai ona toe iloilo i le ta'i ono masina aua ni suiga e finagalo i ai le afioaga. *E le mafai ona suia e le Vaega o Faigafaiva lenei Taiala sei vagana ua malilie autasi i ai le Komiti ma le afioaga o Sasaai.*

3.1 Tapenaga o le Taiala

Sa auai le tofi pulenuu le Susuga Segi Iosefo i le mafutaga faaleaoaoga a le Vaega o Faigafaiva faatau i Faasao o le Gataifale ma sa ia faailoa ai lenei mataupu i lo latou afioaga ona faapea lea ona faatoai mai le manaoga o le afioaga i le Vaega o Faigafaiva. O lenei Fuafuaga Tatau / Taiala sa faatino lava e le pule a alii ma faipule ma le afioaga o Sasaai faatasi ai ma le lagolagosua a le Vaega o Faigafaiva.

3.1.1 Fono Muamua a le Afioaga ma le Vaega o Faigafaiva

Na usuia le fonotaga aloaia muamua a le fono a alii ma faipule o Sasaai ma le Vaega o Faigafaiva i le aso 3 Tesema 2009. Sa faamalamalamaina ai e le Ofisa le aoga ma le taua o lenei polokalame ma sa taliaina ai loa e le afioaga ma faapea ona faaalia ai lo latou agaga faafetai ona ua auai i lenei polokalame taua. O le faamoemoe e mo le manuia o tagata lautele o le afioaga faapea fanau i le lumanai.



3.1.2 Faatalatalanoaga ma Vaega o le Afioaga

Sa faatinoina i le aso 19 Fepuari 2010 fonotaga ma faatalatalanoaga ma vaega eseese o le afioaga e aofia ai le vaega o matai, tina ma tamaitai faapea aumaga. Sa talanoaina i ia vaega faafitauli o le gataifale o lo o alia'e i le afio'aga, atoa ai ma ni fofo talafeagai e ono foia ai. E le gata i lea o le faia o ni tulafono a le afioaga e faamalosia ai le puipuia ma le vaaia lelei o le gataifale.

3.1.3 Komiti Faufautua o le Faasao i le Gataifale

O lenei Komiti o lo o aofia ai sui na filifilia mai i vaega eseese o le afioaga e latou te molia finagalo fa'aalia i le fono a matai. O le Komiti foi faapea le fesoasoani a le Vaega o Faigafaiva na latou tuufaatasia faamaumauga ma faamatalaga mai vaega taitasi ma tapenaina ai le ata faataitai o lenei Fuafuaga Tatau/Taiala. O le a nafa foi le komiti ma le faatinoga o matafaioi ma galuega a le afioaga e pei ona ta'ua i le Taiala faapea le soosoo tauau ma le Vaega o Faigafaiva.

3.1.4 Pasiaina o le Fuafuaga Tatau / Taiala i le Fono Mulimuli

O le fonotaga mulimuli i le aso _____ na tuuina aloaia atu ai lenei Fuafuaga Tatau / Tusi Taiala e le Komiti filifilia a le afioaga ma le Vaega o Faigafaiva i le fono mamalu a alii ma faipule mo le pasiaina. O le fono mulimuli foi lea e faaiu ai mafutaga faafonotaga, ae amata loa ona faatino galuega ma matafaioi o lo o totonu o lenei Fuafuaga Tatau.

4 FUAFUAGA FAATAATITIA MA TULAFONO

Otootoga

O fuafuaga faataatitia o ni gaioiga ua faamoemoe e faatino ina ia foia ai faafitauli sa faaalia mai e vaega eseese o le afioaga. E lua vaega o fuafuaga faataatitia ua fuafuaina:

- i) Fuafuaga faataatitia ua faaagaga e faatino e le komiti ma le afioaga;
- ii) Fuafuaga faataatitia mo le Vaega o Faigafaiva lea e patino lava i le tuuina atu o fautuaga mo le nofoaga FAASAO i le gataifale faapea atinae ma matapu tau faigafaiva.

O nisi o tulafono ua ta'ua i lalo o lo o faamamafa ai tulafono autu a le malo e puipuia, faaaoga, ma pulea tatau ai punaoa ma alāmanuia o le gataifale.

4.1 Tulafono Autu o Faigafaiva

O le Tulafono Autu o Faigafaiva 1988 ua avea ma taiala mo puipuiga, galuega ma isi vaega tau faigafaiva e pei:-

- o le faasaoina, puleaina ma le atina'eina;
- faasaina o faigafaiva le talafeagai;
- faamalosia le laiseneina o vaa-fagota mo fagotaga faapisinisi faapea le
- vaaia o taiala ma maliega aua le pulea tatau o faigafaiva i le va ma atunuu i fafo.

O nei vaega o le tulafono e le o lava le silafia e le toatele o tagatanuu o Samoa aemaise le faamalosia ma le usitaia e afioaga. Ona o nei faafitauli ua taumafai ai lenei polokalame e unaia nisi o vaega o lo o faatinoina nei e pei o le faia o nofoaga faasao i gataifale o afioaga faapea aoaoga mo le faamalamalamaina ma le silafia e le mamalu o le atunuu o le taua o nei atinae.

4.2 Tulafono Faatonutonu o Faigafaiva (mo le Laiti o l'a ma Figota)

O Tulafono Faatonutonu 1995, e faatapulaa ai le laiti o l'a ma Figota e fagotaina ma o lo o faatauaina ai nisi o vaega e pei o:-

- aiāiga mo le puipuiga ma le faasaoina e aofia ai le faasaina ona fagotaina ma le faatauina o nisi o ituaiga o l'a ma figota;
- mea fagota e faasaina ma pole mo fagotaga (faigafaiva i tuaau);

- fua faatapulaa o i'a ma figota e faatagaina ma isi.

4.3 Tulafono Laiti a Afioaga

O Tulafono Laiti a afio'aga ua amanaiaina e le faamasinoga. O se tasi lea o auala ua amanaia ma faataua ai e le Malo pulega a alii ma faipule faapea afioaga ua latou mafai ai ona molia i le tulafono soo se tagata e lē usitaia tulafono ua aiaia i totolu o lenei Fuafuaga Tatau / Tusi Taiala.

O tulafono laiti e soalaupule ma autasi iai le pule mamalu a alii ma faipule o afioaga taitasi faapea le fesoasoani a le Vaega o Faigafaiva.

5 FUAFUAGA FAATAATITIA MA TULAFONO A SASAAI

5.1 Faasaina o Faigafaiva le Talafeagai

O nisi o auala tau faigafaiva ua mautinoa le ogaoga o latou aafiaga i le faaleagaina o nofoaga taua mo le tele o i'a, figota ma isi meaola o le gataifale. O nei faigafaiva le talafeagai e aofia ai **ava niukini, fanaia, vailaau oona** faapea **faamo'a/tu'iga**. O nei faiga e le gata ina faatamaia ai se vaega tele o le gataifale ae ua faapea foi ona umi se taimi e toe faaleleia ai e le gata i amu aemaise o i'a, figota ma isi punaoa.

Talu ai ona o le tele o aafiaga i le gataifale o lea ua a'e ai se finagalo autasi i le fono a alii ma faipule faapea le komiti ua filifilia ina ia matua faamalosia loa tulafono e puipuia ai gataifale mai faigafaiva ma ia toe unaia ma faamamaluina le faasaina o faigafaiva le talafeagai.

5.1.1 Tulafono

Mo silafia e le lautele:-

"*Ua matua faasaina lava ona toe faatinoina faigafaiva le talafeagai e pei o ava niukini, fana'i'a faapea ma vailaau oona.*"

O le puipuiga ma le faamamaluina o lenei tulafono o le a i aao o alii ma faipule faatasi ai ma le lagolagosua a tagata o le afioaga.

5.1.2 Faasalaga

O soo se tagata o le afioaga o Sasaai e solia lenei tulafono, o le a faasalaina i le **\$500.00**, ae o tagata ese e faasalaina i le **\$1,000.00**. A le usitaia o le a molia loa i tulafono o Faigafaiva poo tulafono laiti a le afioaga.

Fuafuaga faataatitia a le Vaega o Faigafaiva

O le a fesoasoani le Vaega o Faigafaiva e faamalamalama tulafono i le afioaga faapea le molaina o i latou e solia lea tulafono.

5.2 Taofia le Faiva o le Fa'amo'a poo Tu'iga

5.2.1 Tulafono

Mo le mamalu o le atunu faapea tagatanuu o Sasaai:-

"*Ua matua faasaina ona toe faatinoina faiva o le fa'amo'a ma tu'iga/sa'euga i gataifale o lenei afioaga.*"

O le puipuiga ma le faamamaluina o lenei tulafono o le a i aao o alii ma faipule faatasi ai ma le lagolagosua a le afioaga.

5.2.2 Faasalaga

Soo se tasi o le afioaga e solia lenei tulafono o le a faasalaina i le **\$500.00**, ae mo tagata ese o le a faasalaina i le **\$1,000.00**. A le usitaia ia faasalaga, o le a molia loa i tulafono a le Vaega o Faigafaiva poo tulafono laiti a le afioaga.

Fuafuaga Faataatitia a le Vaega o Faigafaiva

O le a fesoasoani le ofisa e tuuina atu pepa o faamatalaga i faigafaiva le talafeagai faapea fautuaga talafeagai.

5.3 Ia Faasaina Upega ma Tili Matanini'i

O tili ma upega o isi auala ia ua fesoasoani tele i le faaitiitia o i'a maua ma i'a lapopoa lea e mafai ona tautuufua ma fanafanau. Ona o le tūga o aafiaga e o'o iai i'a maua ona o upega ma tili mataninii ua faaalia mai ai e le afioaga lo latou matua lagolagoina o le tulafono a le malo ua iai nei mo le faatapulaaina o matāupega ma tili mataninii.

5.3.1 Tulafono

Mo le afioaga o Sasaai faapea le mamalu o le atunu:-

"Ua matua faasaina lava ona toe faatinoina faigafaiva e faaaogaina ai upega (matāupega itiiti ifo ma le 50mm/2.0 inisi pe a fua sūsū) ma tili mataninii (matāupega itiiti ifo ma le 30mm/1.2 inisi pe a fua sūsū) i gataifale o Sasaai."

O le puipuiga ma le faamamaluina o lenei tulafono o le a i aao o alii ma faipule faatasi ai ma le lagolagosua a tagata o le afioaga.

5.3.2 Faasalaga

*O soo se tagata o le afioaga na te solia lenei tulafono o le a faasalaina i le **\$200.00**,* ae o tagata ese o le a molia i tulafono faatonutonu o faigafaiva. O le lē usitaia o lea faasalaga o le a molia loa i le tulafono o Faigafaiva.

Fuafuaga faataatitia a le Vaega o Faigafaiva

O le a lagolagosua le Vaega o Faigafaiva e ala i lana polokalame fesoasoani o le tuuina atu o faamatalaga e faamautuina ma faamalamalama ai lenei tulafono.

5.4 Faia le Nofoaga/Ogasami Faasao o le Gataifale

Ua malilie le afioaga e faailogaina se nofoaga o le gataifale i le aloalo e avea ma vaega faasao e malu ma nonofo ai i'a, figota, amu ma isi meaola o le sami. O le autu taua o le faasaoina ai o amu faapea i'a, figota ma isi meaola o le sami ina ia mafai ona maua e nei meaola se nofoaga malu e ola, tautuufua ma fanafanau ai aemaise le toe faatupulaia pea aua le fofoga taumafa ma le tamaoaiga.

5.4.1 Tulafono: Faasaina Faigafaiva i totonu o nofoaga fa'asao

Mo le afioaga o Sasaai faapea tagata mai isi afioaga:-

"Ua matua faasaina soo se ituaiga faigafaiva poo fagotaga pe solia foi le nofoaga fa'asao o le afioaga".

O le puipuiga ma le faamamaluina o lenei tulafono o le a i aao o alii ma faipule faatasi ai ma le lagolagosua a le afioaga.

5.4.2 Faasalaga

Mo soo se tagata o le afioa'ga e solia lenei tulafono o le a faasalaina i le \$500.00 ae mo tagata ese o le a faasalaina i le \$1,000. O le le usitaia pe teena foi ia faasalaga o lea molia loa i tulafono laiti a le afioaga.

Fuafuaga faataatitia a le Vaega o Faigafaiva

O le a fesoasoani le ofisa e fai polokalame faalauiloa i le taua o nofoaga faasao aemaise le tufatufaina atu o faamatatalaga mo le malamalama o le afioaga.

5.5 Taofia le fagotaina faapisinisi o Fugafuga ma isi ituaiga

O le fugafuga, maisu ma isi ituaiga o lea punaoa ua tele ina manaomia i maketi i fafo aemaise atunu Asia. O le soona fagotaina o fugafuga ua tulaga faaletonu ai ma ua malilie ai le afioaga ina ia faasaina ona fagotaina fugafuga ma isi ona ituaiga mo le faatauina atu i fafo.

5.5.1 Tulafono

Mo le afioaga faapea nuu tuaoi ma tagata ese:-

Ua matua faasaina lava le fagotaina o fugafuga, maisu ma isi ituaiga mo le faatauina atu i maketi i fafo.

5.5.2 Faasalaga

Mo tagata nuu o Sasaai o lea solia lea tulafono o lea faasalaina i le \$500.00 ae o tagata ese o le a faasalaina i le \$1,000.00. O le le utagia o ia sala o le a molia loa i tulafono a le malo poo tulafono laiti a le afioaga.

Fuafuaga Faataatitia a le Vaega o Faigafaiva

O le matafaioi a le ofisa o le lagolagosua ma fesoasoani i le afioaga i le faamalosiga o le a tulafono e ala i faalauiloa ma fautuaga talafeagai e tuuina atu faapea suesuega o ni moliaga e tula'i mai.

5.6 Taofia le Faatafunaina o Gataifale o Sasina

O le lafoai o lapisi ma otaota i le sami ma le matafaga o se tulaga leaga tele ma o le faapogai lea o le tele o faafitauli aemaise lava i lapisi e pei o uamea, pepa iila, atigi fagu, atigi apa, fagu pa'u ma isi otaota.

O fuafuaga a le afioaga e le gata i le tulafono ae o le a faia foi galuega e aoina ese ai lapisi aemaise pepa i'ilā, u'amea ma atigiapa mai le matafaga ma le gataifale.

5.6.1 Tulafono

Mo le afioaga faapea le lautele:-

"Ua matua faasaina lava ona toe faatafunaina le gataifale, ma ua faasaina le lafoai o otaota/lapisi pei o atigi apa, uamea, pepa iila ma isi i gataifale o le afioaga".

O le faatinoga, puipuiga ma le faamamaluina o lenei tulafono o le a i aao o alii ma faipule faatasi ai ma le lagolagosua a le afioaga.

5.6.2 Faasalaga

Mo le tagatanuu o Sasaai e solia lenei tulafono, o le a faasalaina i le **\$100.00** ae o tagata ese o le a faasalaina i le **\$200.00**. A le usitaia lenei tulafono o le a molia loa i tulafono laiti a le afioaga.

Fuafuaga Faataatitia a le o Faigafaiva

O le a fesoasoani le Vaega o Faigafaiva e tufatufa atu ma faamalamalama pepa o faamatalaga i le afioaga, mo le silafia e le lautele o le tele o aafiaga mai le lafoai o otaota ma lapisi i le gataifale.

5.7 Faasaina le taaloa o Meaituaolō i le gataifale

Ua finagalo alii ma faipule ina ia vaaia lelei le gataifale ma ua tatau ona taofia le taaloa o meaituaolō i le matafaga.

5.7.1 Tulafono

Mo le afioaga o Sasaai:-

“Ua faasaina nei ona taaloa meaituaolō i le gataifale aemaise le matafaga”.

5.7.2 Faasalaga

Mo soo se aiga e le usitaia lenei tulafono o le a faasalaina i le **\$100.00**.

Fuafuaga Faataatitia a le Vaega o Faigafaiva

O le a fesoasoani le ofisa e tuuina atu faamatalaga ma fautuaga talafeagai.

5.8 Aoina ma Faatamaia Alamea

Fuafuaga Faataatitia a le Afioaga

O le a galalue le komiti ma le afioaga aemaise le au tautai ina ia aoina mai uta alamea ma faatamaia ma tanumia ai ona o ia meaola o lo o faalfaua i le sami ma tele ina pepē ai amu.

Fuafuaga Faataatitia a le Vaega o Faigafaiva

O le a fesoasoani le ofisa e tufatufaina atu pepa o faamatalaga faatatau i ia meaola o le sami ma tuuina atu fautuaga i le afioaga.

6 TALOSAGA A LE AFIOAGA

Ua talosagaina e le afioaga o Sasaai le fesoasoani a le Vaega o Faigafaiva ina ia silasila ane i ni atina'e talafeagai mo lenei afioaga pei o le:-

- Figota talafeagai mo le fa'atoagaina pei o faisua, aliao ma isi;
- Faia se talosaga i le UNDP/JICA mo se fesoasoani e faaleleia ai atina'e e pei o le faailogaina o nofoaga faasao faapea atina'e talafeagai;

Fuafuaga Faataatitia a le Ofisa o Faigafaiva

Ua i ai le maliliega a le Afioaga faapea le Komiti (KFVL) ma le Vaega o Faigafaiva o le a toe auililiina lenei **Fuafuaga Tatau / Tusi Taiala** pe a maea le ono (6) masina talu ona pasiaina.

7 UPU MULIMULI

O le auai o le afioaga o Sasaai i lenei polokalame faasao i afioaga ua mautinoa le faatauaina o le gataifale aemaise le soifua manua o tagata lautele o le afioaga. O le manua ma le alualu i luma o lenei polokalame e faalagolago lea i le galulue faatasi o le afioaga i le pule mamalu a alii ma faipule, komiti a tinā ma tamaitai, aumaga aemaise o le Malo e tau ala atu i le Vaega o Faigafaiva i le faatinoina o fuafuaga faataatitia ua maea ona soalaupule i fonotaga ma faatalatalanoaga.

O lenei polokalame o se galuega e umi se taimi o faatali lona fua mai ae peitai ua mautinoa le toe faaleleia ai o punaoa ma alamanua o le gataifale e faalagolago iai ai aiga ma le afioaga. O lenei fuafuaga e mo le manua o tagatanuu lava o le afioaga faapea tupulaga i le lumanai.

8 SUI AUAI I FONOTAGA MA FAATALATALANOAGA

Sui o Sasaai

MATAI & AUMAGA		TAMAITA'I
Segi Iosefo (pulenuu)	Ekeroma Siulala	Onolina Lapa
Fetuli Epe	Semu Fata	Vaaipu S. Tea
Moana Lepa loelu	Fatu Pule	Fuamata Tuu
Faatoaga Pule	Jerry Segi Sefo	Maugafa F.S
Komisi Taitafe	Nineva Taitafe	Fituafe L.T
Tovia Fatu	Viliane Eteuati	Nellie Vai

Sui o le Vaega o Faigafaiva

Tauaeafā Autalavou (Alīi Ofisa Sinia, Upolu)	Malaeulu Mamoe Malolo (Alīi Ofisa Savaii)
Totive Aloaina (Alīi Ofisa Sinia, Savaii)	Maatui Filifili (Alīi Ofisa Lagolago)
Tafatoa Ferron Fruen (Alīi Ofisa, Upolu)	Taumoe Sau (Alīi Ofisa Lagolago)
Tauvae Su'a (Alīi Ofisa, Upolu)	

Sui o le Komiti a Sasaai

MATAI	AUMAGA	TAMAITA'I
Segi Iosefo (pulenuu)	Viliane Eteuati	Sasaai Vaafusuaga
Toti Siulala	Fatu Pule	Eni Rimoni
Matagitau Vaili	Semu Fatu	Toalua Meni
Tuilala Sageli		